

Iqalunni ammaannersuinermi naatsumik oqaatigisassatut missingusiaq

Inatsisartut Aalisarnermut, Piniarnermut Nunalerinermullu ataatsimiititaliaat sinnerlugu isumasioqatigiinnissamut uunga qaaqqusaanitsinnut annertuumik qujassuteqarniarpunga. Ataatsimiititaliaq sinnerlugu Inatsisartuni ilaasortaqaatiga siusinnerusukkullu Naalakkersuisunut ilaasortaqaq Ane Hansen aalisarnermi naalakkersuinikkut misilittagaqarluartoq aamma peqataavoq.

Isumasioqatigiinnermut pilersaarusiaq nassiunneqarsimasoq pissanganaqaaq, imartarlu pineqartoq siunissami qanoq aqunneqarsinnaanersoq pillugu Nunavummi aamma Nunatsinni aalajangiisartut aallarnisaataasumik oqaloqatigiilersinnaanerannut siunertaq pitsaasutut isigalugu.

Saqqummiussassatut ilimasaarutigineqartut assigiinngitsut pissanganaqaat. Sila aamma siku pillugit takussutissiat saqqummiunneqartut piniagassarpassuarnut qanoq sunniuteqassanersut soqutigisallugit soorunami Ataatsimiititaliamut pissusissamisoortuuvoq. Allaaserineqartutut immap sikuata peerunnera najukkami inooqatigiit aalisarnermik piniarnermillu inuunniuteqarnissamut periarfissaannik tunngaviusumik allanngortitsilluinnassaaq. Nunatsinni aalisarnermik suliffissuaqarneq inuussutissarsiuutini pingaarnersaavoq, inuuniutigalugulu aalisarneq piniarnerlu ulluinnarni qitiulluinnartuuvoq. Silap allanngornerata nunarsuarmilu silap kissatsikkiartornerata sunniutai siulliulluta malugisarpavut. Ukiuni arlalinni sikuq pissusaa allanngorarsimaqaaq aalaakkaasimananilu, tamannalu misigisimavarput.

Ilutigalugu najukkami inooqatigiittut ima inissisimavugut silap allanngorneranik annikitsuaqqamik sunniuteqarsinnaalluta. Siku qanittutsinni avatangiiserivarput, sikullu qanoq inneranut naleqqussartuurtarpugut. Inooqatigiinnikkut kulturikkullu pissutsit tunngavigalugit aalajangersimasumik najugaqarfeqartarpugut, inuuniarnitsinnilu siku tunngavigisatta ilagiinnarpaat. Ukiup qanoq ilinera malillugu aalisarnikkut piniarnikkullu periarfissat tunngavigalugit inuunitsinni naleqqussarnissarput unamminaqaq – sikuusarnera sikuusannginneralu apeqqutaatinnagu. Oqaatigigisariaqarparali siku pillugu takussutissiat ingasalluinnartumik allannguutissanik takussutissiimmata, tamannalu ilungersunarluinnarpoq.

Naleqqussarsinnaanitsinnut unammilligassat ilagaat nunarsuarmioqatitta aningaasarsiornikkut issittumut soqutiginnikkaluttuinnarnerat. Qanittumiittunut nunanut suliffissuaqarfiusunut naleqqersuutissagutta Nunarput inukitsuararsuuvoq. Piffissallu ingerlanerani paasinartarpoq aningaasarsiornikkut soqutisat pinngortitamit uumassuseqarfiusunillu salliutinneqartuaannartut. Taamaattumik Issittumiunngitsaq aalajangikkat Issittumut ajortumik sunniuteqannginnissaat qulakkeertariaqarparput. Uagut suli takorloorparput aalisarneq piniarnerlu nungusaataannigsumik tunngaveqarlutik ingerlanneqartuassasut, silallu allanngorneri nikerartut naleqqussarfigalugit ingerlanneqassasut, takorloorparpullu pisarnertut inuusaatitta attatiinnarnissaanut periarfissaqassalluta.

Kiisalu aammaarlunga qujassutigeqqikkusuppara Inatsisartut Aalisarnermut, Piniarnermut Nunalerinermullu Ataatsimiititaliaat maani peqataasinnaammat, oqaaseqarsinnaagamalu.

Qujanaq.